

Nuummi Sisimiunilu killilersuinerit pillugit Namminersorlutik Oqartussat utaqqiisaagallartumik nalunaarutaat

Nappaatit tunillaassortut akiorniarlugit iliuitsit pillugit Inatsisartut peqqussutaanni nr. 20, 12. november 2001-imeersumi, Inatsisartut inatsisaatigut nr. 1, 1. april 2020-meersutigut allanngortinneqartumi §§ 6, 6 a, 12 b, § 21 b aamma § 29, imm. 2 aamma § 3 naapertorlugit uku aalajangersarneqarput:

Atuuffia

§ 1. Nalunaarut manna atuuppoq:

- 1) Kommuneqarfik Sermersuumi Nuummi.
- 2) Qeqqata Kommunianni Sisimiuni.

Imm. 2. Nalunaarut Kalaallit Nunaanni Peqqinnissaqarfimmut imaluunniit nakorsiartarfinnut kiisalu nakorsiartarfinnut namminersortunut niuertarfinnilu peqqissaanermik naalagaaffimmit akuerisaallutik ingerlatani ingerlatsisunut atorfeqartitsiffiusunullu atuutingilaq.

Imm. 3. Nalunaarut katersuunnernut, politikikkut allatulluunniit isummersornissamik sunniiniarnissamik siunertalinnut atuutingilaq.

Imm. 4. Nalunaarut eqqartuussivinnut atuutingilaq.

Imm. 5. Nalunaarut namminersortunut pisortaniillu ulluunerani neqeroorutitut, atuarfinnut, ilinniarfeqarfinnut il.il. nappaatit tunillaassortut akiorniarlugit iliuitsit pillugit Inatsisartut peqqussutaanni § 22 naapertorlugu atuutsingilaq.

Imm. 6. Nalunaarut angerlarsimaffinni aaqqissuussanut il.il. atuutingilaq.

Imm. 7. Nunatsinni Nakorsaaneqarfik nalunaarummit immikkut akuersissuteqarsinnaavoq.

Nuummiit Sisimiuniilluunniit aallarnermi piumasaqaatit

§ 2. Inuit Nuumminngaanniit Sisimiuniilluunniit nunatsinni sumiiffinnut allanut angalasut Covid-19-imik tunillanneqarsimannginnertik uppersaqqartinnagu katerisimaarnernut, aaqqissuussanut, sammisasaqartitsinernut il.il. peqataaqqusaanngillat. Matumani illup iluani, silami, pisortat inuillu katerittarnerat, aaqqissuussinerit sammisasaqartitsinerillu il.il. tamanna atuuppoq.

Imm. 2. Pisortat suliffeqarfutaanni assigisaanilu isersimanermut, inuussutissarsiortut inigisaanni tamanut ammasuni isersimanermut aamma pisortat namminersortullu utoqqarnik paaqqinnittarfiut napparsimavinnuunniit isersimanermut imm. 1-imi inerteqqut aamma atuutsinneqassaaq. Taamaattorli qanermut kiinnamulluunniit assiaqutit atorlugit Covid-19-imut misissortinnissaq, ulluinnarni

nioqqutissanik pisiniarnissaq allallu pisariaqavissut allanit isumagineqarsinnaangitsut isumaginissaat akuerineqarput.

Imm. 3. Inuit Covid-19-imut akiuussutissamik tamakkiisumik kapitissimasut imm. 1-imut ilanngunneqanngillat. kapitissimanermulli uppersarsaatit takutinneqarsinnaasariaqarput.

Imm. 4. Meeqqat 11-nik ukiullit ukiukinnerusulluunniit piumasaqaammi imm. 1-imi ilaatinneqanngillat.

Imm. 5. Inuit imm. 1-imi pineqartut Nuumminngaanniit Sisimiuniilluunniit angalasut ullut tallimassaanni kingusinnerusukkulluunniit Covid-19-imut misissortissinnaapput. Misissuinnermut akissut tunillatsissimangitsutut nalilerneqarpat, Covid-19-imut tunillatsissimangitsutut isigineqassaaq.

Imm. 6. Inuk Covid-19-imut misissortinngippat imm. 1-imi inerteqquteqarneq Nuumminngaanniit Sisimiuniilluunniit angalanerup kingorna ulluni 14-imi atuutissaaq, taamaattorli § 8, imm. 2 takuuk. Inuk ullut 14-it sinnerlugit Covid-19-imik nappaateqarnermut ersiuteqarsimangikkuni Covid-19-imik tunillanneqarsimangitsutut naatsorsuutigineqassaaq.

Init ilaannut taakkunungalu attuumassutilinnut nunaminertanut, kikkunnilluunniit iserfigineqarsinnaasunut tunngatillugit piumasaqaatit

§ 3. Inuit imm. 2-mi taaneqartut inineeqqusaanatillu taakkunungalu attuumassutilinni nunaminertaneeqqusaanngillat, aatsaalli taakkunaniissinnaassallutik:

- 1) Covid-19-imut naamassillugu akiuussuserneqarsimagunik, imaluunniit
- 2) Covid-19-imut misissortissimanermut uppersarsaammik akunnernik sivisunerpaamik 48-nik pisoqaatigisumik takutisisinnaagunik.

Imm. 2. Init taakkunungalu attuumassuteqartut nunaminertat kikkunnilluunniit iserfigineqarsinnaasut aamma nalinginnaasumik inunnit sivikitsuinnaangitsumik isersimaffigineqarsinnaasut imm. 1-imut ilaatinneqarput, assersuutigalugu:

- 1) Sutorniartarfiit, cafii, imerniartarfiit, diskotekit assigisaallu aamma tamakkunungala attuumassuteqartut silami nunaminertat.
- 2) Kulturikkut suliffeqarfiit - tassunga ilanngullugit ilaatigut Kulturikkut Illorsuit, filmeriartarfiit, katersugaasiviit inersuillu saqqummersitsiviit.
- 3) Innuttaasut Illui assigisaallu
- 4) Atuakkanik atorniartarfiit.
- 5) Illut iluini silamilu timersornermut atorneqartartut - tassunga ilaatigut ilanngullugit init timersortarfiit aamma Illorsuit Timersortarfiit, naluttarfiit, timigissartarfiit isikkamillu arsaattarfiit.
- 6) Nujalerisut, tagiartuisartut, pinnersartarfiit assigisaallu.

Imm. 3. Suliffeqarfiit, paaqqinnittarfiit il.il., imm. 2 takuuk, akiuussuserneqarsimanermut uppersarsaammik imaluunniit Covid-19-imik nappaateqannginnermut uppersarsaammik qinnuiginnissinnaapput.

Imm. 4. Init tamakkunungalu attuumassuteqartut nunaminertat tullinguuttut makku imm. 1-imi piumasaqaatinut ilaatinneqanngillat:

- 1) Init tamakkunungalu attuumassuteqartut nunaminertat niuertarfiit atorneqartut.
- 2) Allakkeriviit.
- 3) Mittarfiit
- 4) Pisortatut oqartussani pilersuiffusunilu init sullissiviit, saaffiginnittarfiit il.il.

5) Pisortat angallassissutaannut tunngatillugit utaqqisarfiit.

Imm. 5. Inuit tullinnguuttut makku imm. 1-imi piumasagaatinut ilaatinneqanngillat:

- 1) Sulisut inini pineqartuni imaluunniit tamakkununga attuumassuteqartuni nunaminertani suliallit.
- 2) Inuit Covid-19-imut akiuussutissamik kapitinnissamut Nunatta Nakorsaaneqarfianit nalinginnaasumik innersuunneqanngitsut.
- 3) Inuit 11-nik ukiullit ukiukinnerusulluunniit.

§ 4. Inuk Covid-19-imut tamakkiisumik akiuussuserneqarsimasutut isigineqassaaq inuup akiuussuserneqarsimanerup ingerlarngata naammassisimanagera uppersarsinnaappagu.

Imm. 2. Nunatta Nakorsaaneqarfiata akiuussuserneqarsimanerumut uppersarsaatit sorliit akuerisaanersut aalajangissavai.

Pingaartumik inunnut Covid-19-imik siusinnerusukkut tunillatsinnikunut

§ 5. Inuit siusinnerusukkut Covid-19-imik tunillatsinnikuusimasut PCR-ilu atorlugu misissortereerermikkut Covid-19-imik tunillatsissimanerminnullu minnerpaamik ulluni 14-ini annerpaamik sapaatit akunnerini 12-inik pisoqaassuilinnik uppersarsaasinnaasut, inatsisitigut tamakkiisumik akiuussuserneqareersimasutut isigineqassapput.

Imm. 2. Uppersarsaat suna uppersarsaatit akuerisatut atorneqassanersoq Nunatta Nakorsaaneqarfiata aalajangersinnaavaa.

Inuit pillugit paasissutissanik suliarinninnerit

§ 6. Nalunaarut una naapertorlugu inuup akiuussuserneqarsimaneranut inissisimaffia uppersarsarniarlugu inuit pillugit paasissutissanik suliarinnittoqarsinnaavoq.

Iliuissat

§ 7. §§ 2 aamma 3-mik unioqqutitsisoq pinerluttulerinermik inatsit malillugu pineqaatissinneqarsinnaavoq.

Imm. 2. Ingerlatseqatigiiffit il.il. (inatsisilerinermi inuttut immikkoortutut isigineqartut) pinerluttulerinermik inatsimmi kapitali 5-imi malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

Atuutilersitsineq aamma atuunneranut piffissaliussaq

§ 8. Nalunaarut ulloq 1. november 2021-mi atuutilissaaq.

Imm. 2. Nalunaarut malillugu killilersuinerit, inerteqquteqarnerit, peqqusinerit il.il. 30. november 2021 ilanngullugu atuutissapput.

Kirsten Fencker
Peqqinnissamut Naalakkersuisoq

/ Aka Olesen

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut